

湘綺樓日記

九

光緒六年庚辰

湘綺樓日記

六年正月己巳朔陰辰初起禮

二祀

三廟畢待家人妝竟受賀諸女濟濟頗盛午始朝食飲三杯微醉少渴熱思風涼昇出至陳妹家賀四母姦女隨往卽還妻女妾擲骰至子寢寢行平原得二石紫潤如桃其本末甚長醒猶歷歷旋皆忘之

二日陰有雨謝客閒居春宵二彭郎胡子威來黃氏壻從其兄來未之見也往歲賀吉甫約曾劼剛至其家滌丈甚怒頻遣三騎追之且語余云未昏壻過門天下有此事否余時年二十餘疏於禮未能答也但以世交修見固不宜因結昏而避以新壻來見則似不可故辭以外出樾岑來

三日陰竟日家人擲骰攤錢門牌時作時輟近歲煩冗於事雖戲劇不能
專精也孔子歎博弃用心觀此復有隆汙之感筠仙攜其少子英郎來
值文心來訪因共留談至暮去文心復留論武岡志書詞句悖謬事辛
眉不檢於文因招物議方今亂世此風不可長宜銷彌之觀香孫辛眉
倡狂恣肆恐復有文字之獄夜得錫九片論張沅生就館事復書詳言
數十年內書生不安分好撞錢之無禮以新立公社采訪清議故新年
作此論也夜雪雹雷頗寒

四日雨將出復罷竟日與妻妾閒談鬪牌夜雪雷

五日雨有雪出詣笛仙春甫皞臣子壽樾岑皆久談樾岑處留麪已暮遂
不他往借鐙而還夜閱少作詩殊不成格曾滌生莫子偲不許余有以
也然兩君知余未成而不知有成之必由此此兩君之所以無成耶子
寢臥談幾至曉

六日晴寒臆緹當往郭家留視懿兒力臣來談僕從俱出婢供茗果因悉謝諸客不見登樓鈔詩葉半裁紉女並疾就側室視之未施被枕拳跼而眠

七日雨昇訪筠仙春孩子久出談稍久夏糧儲約游定王臺期以日昃因往視客集否則主人及劉定甫道臺況顏山知府已在況則循吏況鍾之後也陳又銘吳昀谷莊心安相繼來下磴登樓縱談時事見壁間題刻多集北海書勝於賈祠俗書也芝岑任糧儲三年修復二處均數千金之工城中遂有游賞宴集之地此人殊不可少因攷定王廟唐宋人俱云在麓山水經注言長沙王城在湘東則今臺正王宮也述異記云故宮蓼園真定王園不知真定何王余以爲趙佗祖父真定人蓋趙氏之園故得在定王宮前夜寒頗劇歸小坐卽眠

八日陰雨新年諸親友尙有未見者不可太遲勉出詣香孫余佐卿胡子

威張力臣俱入談佐卿處遇陸恆齋同佐卿往笠雲僧處尙有數處未
入子威有蓼園考證數語殊無把握取其能知真定王爲王封耳力臣
報志臣之喪往唁意城已赴筠仙處矣遂還夜寒風急假寐至二更乃
起喫牢丸丑初寢

九日風寒莫總兵從子觀庭孝廉及袁守愚來登樓作定王臺記并和姜

白石一萼紅詞云

漢王宮正良辰勝賞荆楚歲華積草觀聽嘶松留編
守誰道時序息息入春早商量梅柳看嫩紫新綠引

東風花在水西浮鴈歸人後酒滿吟中懷古感時都罷喜清時政暇故
國年豐一水西浮鴈歸人後酒滿吟中懷古感時都罷喜清時政暇故
寒澗石牀東寄語繁
花明年更映人紅莫觀亭來言莫氏須礮船護送當待二月半乃能

行余不能待之羅子沅來段懷堂來言衡州訟事由知府貪蓮稅陋規
慙慙劣生爲之 廷寄彭雪琴令速赴江防張皇武備夜鏡初道遇佐
卿與至其家小坐同去待至初更鏡初乃歸言校經堂事

十日陰寒竟日坐房中廖總兵陳從九之子左斗才來夜雪

十一日雪治具約樾岑文心鏡初佐卿齋會議校經堂事復要錫九議之
文心最先至坐四時許亥初乃散

十二日晴與妻子攤錢竟日未見客中唯笛仙來始一出談子壽繼至誇
張洋人之礮似小兒癡語不足一笑以新年姑唯唯聽之夜訓飭六雲
六雲撫拾閒言意怨女君法語異語均不能入反復數千言僅而輸服
方知周公告殷頑未爲繇也樾岑書來言校經堂宜考試乃入館未詳
學使之意戊寢中夜聞功兒頻起疑其所產子不能成未便呼問之甚
旁皇不安待曉功兒來問安詢之果死矣此兒未全乎人又未名不爲
殤也

十三日晴登樓鈔詩二葉皦臣來不意其能出急出見之談話一時許春
甫來未遑接對也力臣來尤不宜接而陽春不解事徑爲通刺無惑乎
筠仙之捶擊閤人也姚力雲亦相繼來纏綿兩時之久始得少悵子久

復來長談殷殷問爲學方詢以當世要書云略披覽矣余云君此時當務有用之學志在爲宰相莫若通經術也因先與論詩禮借所作詩牋示之客去已暮羅嬖來毛妹亦來均卽日去夜就側室眠

十四日晴以今年閒日少率家人博戲黃親家及女客僕婦紛然來又不成局吾家恆苦慇忙由治事人太少又每事必躬親故執掌如此鈔詩二葉夜攤錢雨子寢

十五日陰雨夕有朧月漁人送鐙來屋小無以待之夜祠

三祀

三廟家人皆免行禮喫湯丸攤錢至子寢

十六日陰晴晏起錫九來屬作西關祠戲臺聯

演段亦聲容居然晉舞秦謳慷慨鳴鵠增壯氣

芭祠義烈遙想荆城益瀨往來風馬卷靈旗

並言劉故撫招飲余當齋日未可赴宴集也欲

鈔書怱怱復輟出過嶧臣莫孝廉出南門省

先墓過唐知府不遇入瀏陽門至子壽處少坐赴姚立雲招飲三知縣黃子均同集戍散大雨舁人霑溼歸猶滴瀝半宵有春霖之意

十七日陰晴晨作片辭劉故撫袁守愚胡子威左生致和均來久談鈔書二葉張東丈來謝未見寢緹出答拜諸親友家晡後歸余過弔劉馨室還飭祠事夜鬪牌鷄鳴乃寢

十八日陰雨齋居樾岑來談言今日司道公宴巡撫費二百金以爲李言節儉不能躬行之明驗也丁公爲政異於此曾胡則不言節儉似又高於丁余不喜言儉而必裁冗費尤不信有言弗信之事惜不得一試行之朱英所謂無可奈何京師傳誦王先謙邪說一疏極爲丁公道地欲以此邪說救前邪說也前有聯云

一體寶鑒心杜寶廷口出寶名氣可惜
一寶押錯體壽昌志述壽慈事救

壽農命居然
三壽作朋

鈔詩三葉周頌甫畢計一月得十五葉常課猶不及半夜

兩兒飭祭器筵几妻婦治饗過三更甚寒且風齋宿湘綺樓讀笛仙三

江考

十九日陰晴祠

三廟辰正行事午成纂未正出答訪二客便過樾岑飲酌谷子壽繼至戊散絺子來

廿日陰欲雪朱宇恬送漆器肴餌湖北撫潘母憂夏芝岑奉滿引見謝小莊當代印昨來訪辭未見便往一談多撫浮言論蜀事余隨事折之其云鹽貴病民及民憂淡食皆公牘不通之論也言都比堰尤不知堰事二余夜來

廿一日陰晡後雨鈔詩二葉獨居謝客令璫帨檢禮記大夫特羊句未得經記生疏可懼也與佐卿約過筠仙遇子壽久談冒雨還佐卿來夕食廿二日晴得超羣族兄書爲其子代綱覓館令登樓見之言動似尙不鄙謬姑令其從入蜀以族中子弟多不能皆從令還家自備資斧申過力

臣飲樾岑先在言奉檄督銷淮鹽余欲上條呈盡罷湘人之仰食諸局者以敦本業警游惰念教養非己任姑倡其議而已自諸局薪水興風游惰子弟人人有謀食之路所損於鄉俗不少此當亟革者也叻谷子壽繼至戍散

廿三日晴戒裝往妻父家令早發而舁夫遲誤行時已辰正矣出草潮門從魚網市渡湘經龍回潭渡一水水從寧鄉湘潭七都曲屈東北流未知其名案水經注湘水左會瓦官水口疑此水也依地而言此水在右以湘北流故以右爲左渡瓦官循水上十里余家灘十里九公廟取山徑從大石頭望仙女山而行可廿里皆不記其地名至桐坤已昏黑籠鐙行可八九里至蔡家已戌正矣外舅姑皆衰穢棣生云大病桐生夫婦出見與循妾子亦出至子初館我於客房初昏時所止也几榻蕭條無復當時之景

廿四日陰停蔡家移榻橫廳五間空無人至唯叢蘭數十盆臥犬當園門未涉園也午睡夕食後出視外王舅姑墓桐生父子同行夜與談親友寂寥今不如昔感慨久之獨宿園齋與一犬爲鄰以外舅近起甚晏先告辭待明而發

廿五日陰晨待僕夫不至自出視之則門已關斷開關呼之束裝余步出至徐八長門口待轎經稠泉靶子塘泥鰍塘賀家壩出梔子澗多山道空寒不及昨來平田坦步云較近十里也出梔澗卽九公廟從昨道渡瓦官水渡湘至南湖澗登岸從市中過入小西門訪春甫不遇便還三日未飽食甚飢而飯不可減僅食一盃耳搯子來三日矣彭郎夜來是日癸巳驚蟄

廿六日雨登樓鈔書要縹緹攜璫帟宴坐方欲閒論君豫來出談朵園繼至健郎亦闖入旋去朵園坐二時許將夕乃去君豫遂竟日同夕食搯

子告歸束裝作劉馨室母朱挽聯

百年愛日正長春已看簪笏盈庭
鳳翼開五世慶九月西風寒一望

猶憶版輿度嶺饌魚深感故民心
劉曾任吾縣母年近百歲見五世

廿七日晴出弔馨室詣羹安朵翁臯臣子茂均長談赴二黃郎之請坐客
有麻陽令呂慎伯陽湖人頗有常州之貌徐子雲李小園朱江西繼至
二黃曾招余辭未往今再設故不可不去似爲求作父傳尙未言其所
爲耳夜過陳總兵聞造船已成喜其敏速猶有湘軍舊法再三稱之饒
子來見久留逆旅喜客而惡歸殊不可解知人情性好尙絕殊也
廿八日雨晨起飭豐兒率僕人往船步視辦否春甫羅生理安錫九來談
至半日佐卿夜來二更與理安俱去

廿九日晴竹伍杏生黃郎來杏生坐最久言曾劄剛出使俄夷京師議論
紛然可謂無事自擾樾岑來言辰衡守俱撤任粵豫二藩新除淮鹽使
病故价藩開復又議開書局事夕食後訪瞿子久言召見孝達黃素蘭

寶竹坡爲俄事也借子壽二百金辦行兼與其子師韓勉吾談夜還筠仙送大鳥卵及遠物三種鈔詩二葉

晦節雨爲夏芝岑書定王臺記重閱笛仙北江考君豫漢書補表衡陽夏生段海侯殷默存來綱子與其父來其父旋去未見以子弟多牽率父兄爲其營謀余所最不喜豐兒告之故去也將出怯泥待過申乃出過筠仙遇樾岑論俄事余意欲作奏疏通事理戒中外之閥議往咨筠仙以其最悉夷事也值朱速客不得久談往則錫九文心力臣先在香港使其子爲主人已後出然談話甚久未覺其倦竟不知其何病也羅嬰來送行夜與妻女鬪牌

二月己亥朔晴甚煊將登舟竹伍莫覲庭羅郎伯存來縉子來從往蜀與絨綬二子俱先入船余過午乃往舟新修殊未油飾然可開六高鋪並有婢嫗宿處但不知堅緻否峽舟價昂宜於自製船水手尙未集復入

城至春甫處辭行將過臯臣以日夕當赴劉前撫招疾馳而往坐客畢集矣劉恃老免高自矜置前後撫湘者皆其門生後輩唯而不諾此外更莫不降意唯於余加禮敬三辭其招而約益堅可謂禮賢好士者也世人動謂俗人不可與游此殊不然因己俗乃覺人俗耳君子上說下教以友輔仁故無冰炭之傷坐客陳玉三張元達唐次雲皆俗人余與錫九勉吾在雅俗間飲亦甚歡亥散復過鏡初與勉吾同往二更後還僧嬾雲贈詩

二日晴煊鏡初約來談留家中待之發行李留卅金與芳畹以彼囿索怨謗家人恨之久不與通有無也今之不講友誼者多芳畹所逢皆良友所聞皆古道故以爲忘死友卽天下所不容而以此挾持此正吾輩追遠之效癆縋乃以其無賴而責之未免視人太高姑以卅金修好耳午後鏡佐來更約子久來談夕散與佐卿過筠仙盛談夷務筠仙言政事

好立法度望人遵守以夷國能行其法爲不可及且以爲英吉利有程朱之意能追三代之治鋪陳久之余以爲法可行於物而不可行於人者萬物之靈其巧敝百出中國以之一治一亂彼夷狄人皆物也通人氣則詐僞興矣使臣以目見而面諛之殊非事實（又程朱何與三代此則老生俗談）未敢多辨聊曰唯唯否否不然滋女病疥癰緹極憂之使人不安

三日雨煊可一縣晨檢未完筆札並補了之午出詣笛仙香孫東墅佐卿

春陔力臣芝岑皞臣子威仲茗仲雲樾岑告別二張李瞿裴五家未入

佐卿處遇二劉

伯國康侯

言往俄往蜀孰利余云蜀亦外國也然二劉年少

當往俄以練習人事大劉仍留鄉居打佃夫槌木匠可也此所謂思不出位夕過子壽飲入與西老久談一年未見龍黃母俱衰老似閱十年者可懼哉設二席上學陪勉吾及諸附學生余及佐卿力臣子久主人

在左席右席八人未遑通語入坐言校經堂事以余欲招老輩學成者爲可駭云李生元度楊生彞珍必不肯來余言此傳者之陋也見一書院則以爲入院者必學生吾何取乎李楊而生之李楊自可直呼名又何畏乎李楊而生之世俗之見不化學問之事不成因並及思賢講舍之不可無月費余舉四人曰余世松王啓原蔣南枝瞿鴻璣皆他日可大成者諸君試舉一人坐中皆無以應余又再舉彭嘉玉曹耀湘郭嵩燾及余皆方有事於撰述者以此爲思賢講舍之式而不可有學長之目又再舉徐樹銘鄧輔綸楊彞珍黃傳曦皆不居城中者又再舉李文田張之洞黃文琛吳嘉善皆可至講舍游榻者如此方有剏立之益然非財不能聚人經費必歲二萬金乃可今姑小試可耳今日詢勉吾乃知張元達卽繩生之子張廣博之兄也戊大雨昇人踏水還夜鬪牌余甚倦而榻遂寐無覺膠緹頻呼不能起似中毒者頃之乃解

四日雨午出詣程初錫九筠仙徐年伯熊世兄文心竹伍陳妹卜經歷語
別便過畝谷飯姚立雲先在香孫來不肯入張蔭橋之子夷伯黃張金
剛黃春伯知縣同坐夜雨早寢膠緹似不歡竟無一言余未測其意不
敢問也

五日晴登舟欲行樾岑春甫竹伍來送昨在筠仙處佐卿子久約相送至
靖港陳總兵遣長龍爲余客船船制甚大非長龍舊制也兩君强拉力
臣力臣甚不喜事非復舊興今日亦强來久坐膠緹攜輿兒來送坐半
日爲客所絆竟未語而去意似惜別也子久亦不果來佐卿來以無伴
不欲獨送二劉彭郎來送伯固贈行轎康侯登舟陳總兵送酒肴與佐
卿對酌申正船目吳祥發言日忌不宜開行復與佐卿同入城至筠仙
宅力臣設酒邀二郭瞿學士中飲聞雨舁還家妻女婦孫均喜侍談至
子寢得二鄧非女書